

四庫湖北先正遺書存目下冊

四庫湖北先正遺書存目卷三

沔陽盧靖輯刊

子部

三難軒質正無卷數

浙江巡撫採進本

明戴金編金字純夫漢陽人正德甲戌進士官至兵部尚書金自以力行責己克終三者甚難因取以名軒而徵集同時士大夫所贈詩詞序記論說銘贊彙成是編然學在實踐既知三者之難則自勉而已矣徵文刻集何為也且以是三者為難雖聖賢不以為

非本無疑義又安用質正乎

耿子庸言二卷

浙江巡撫
採進本

明耿定向撰定向有碩輔寶鑑要覽已著錄是編爲
所著語錄凡七篇首繹經次冲言次輯聞次比弦次
學筌次牧要次切偲定向之學出於泰州王艮本近
於禪然有鑒於末流之狂縱不甚敢放言高論故初
請李贄至黃安旣而惡之而贄亦屢短定向然議論
多而操履少遂不免有迎合張居正事爲清議所排
講學之家往往言不顧行是亦一證矣

思聰錄一卷

湖北巡撫採進本

明賀時泰撰時泰字叔交一字陽亨陳鼎留溪外傳作字叔文以時泰之名推之交字有義文字誤也江夏人少爲諸生以龔廢因自號曰龔人是書爲其子大學士逢聖所編皆其講學語錄大旨宗良知之說

作師編一卷

湖北巡撫採進本

明賀時泰編首列易蒙卦次列大學聖經一章次列禮記學記一篇次列白鹿洞規五節六十九字次列程董學則一節九十一字終以興文會條件兩頁有

奇皆無一字之發明又屬天下所習見亦何必爲此鈔胥也

人模樣一卷

湖北巡撫採進本

明賀時泰撰是編以人身五官四體之類分目標題往往牽強如元氣一條引唐柳公權語是攝養之法非學問之事兩肘一條引楊時兩肘不離案語腳一條引宋璟有腳陽春事皆關合字面而已其骨頭一條引陳獻章除却此心此理渾是一包膿血裹一塊骨頭語亦是論心非論骨也不及劉宗周人譜遠矣

陳鼎留溪外傳乃稱一時學者俱奉此書爲法則因稱時泰爲人模樣先生蓋講學家標榜之談不足據也

理學傳心纂要八卷

湖北巡撫採進本

清孫奇逢撰漆士昌補奇逢有讀易大旨已著錄士昌江陵人奇逢之門人也奇逢原書錄周子二程子張子邵子朱子陸九淵薛瑄王守仁羅洪先顧憲成十一人以爲直接道統之傳人爲一篇皆前敘其行事而後節錄其遺文凡三卷又取漢董仲舒以下至

明末周汝登各略載其言行以爲羽翼理學之派凡四卷奇逢歿後士昌復刪削其語錄一卷攙列於顧憲成後共爲八卷奇逢行誼不愧古人其講學參酌朱陸之間有體有用亦有異於迂儒故湯斌慕其爲人至解官以從之遊然道統所歸談何容易奇逢以顧憲成當古今第十一人士昌又以奇逢當古今第十二人醇儒若董仲舒等猶不得肩隨於後其猶東林標榜之餘風乎

閑道錄三卷

湖北巡撫
採進本

清熊賜履撰賜履有學統已著錄是書大旨以明善
爲宗以主敬爲要力闢王守仁良知之學以申朱子
之說故名曰閑道蓋以楊墨比守仁也其間辨駁儒
禪之同異頗爲精核惟詞氣之間抑揚太過以朱子
爲兼孔子顏子曾子孟子之長而動詈象山姚江爲
異類殊少和平之意則猶東林之餘習也其中如云
一箇分萬箇萬箇又分萬箇萬箇合一箇一箇又合
一箇然既已合爲一箇不知所云又合之一箇竟指
何物又云無方無方之方無體無體之體無外無外

之外無內無內之內無終無終之終無始無始之始
又云自寂自感自感自寂恆寂恆感恆感恆寂又云
無斷無續無出無入皆不免故爲杳冥恍惚之詞又
云食知味行知步知性知天亦不外此尤不免仍涉
良知之說其謂老氏無止無理不會無欲佛氏空止
空理不會空欲亦不甚中其病至謂學不聞道雖功
彌六合澤及兩間止是私意以陰抑姚江之事功尤
爲主張太過轉以心性爲元虛矣

下學堂劄記三卷

湖北巡撫
採進本

清熊賜履撰賜履既重訂所作閑道錄乃舉向所劄
記摘其與是錄相發明者三百三十有三條定爲此
編前有康熙乙丑自序末條自記成是書時年已五
十矣大旨仍以辨難攻擊爲本其說有曰是陸而非
朱者不可不辯是朱而並是陸者不可不爲之深辨
又曰孟子本靜重簡默之人今日距楊墨明日闢告
許辨論衍衍迄無甯日時爲之也朱子之在淳熙也
亦然闢五宗之狂禪訂百家之譌舛殫力竭精舌敝
頽秃豈得已哉亦時爲之也當今日而有衛道其人

者乎孟朱之徒也其自負亦不淺矣然引蕭企昭之言詈王守仁爲賊未免已甚且其中如論易之類謂六十四卦也說不盡乾坤二卦也不消是亦不免參雜恍惚之論矣

性理譜五卷

湖北巡撫採進本

清蕭企昭撰企昭字文超漢陽人順治丁酉副榜貢生縣志稱其喜講性命之學與熊賜履友善故賜履著書嘗引其說所著有客窗隨筆一卷再筆二卷閩修齋日記一卷雜筆一卷企昭卒後其兄廣昭哀爲

一編總名之曰性理譜亦曰蕭季子語錄其書大旨在於伸程朱而闢陸王與賜履閑道錄所見同

尊道集四卷

湖北巡撫探進本

清朱攀撰攀字良一黃陂人是書成於康熙丁丑第一卷爲聖賢前編自孔子至孟子事蹟及後人論說第二卷節取伊洛淵源錄第三卷節取伊洛淵源續錄第四卷爲前明五子錄紀薛瑄胡居仁羅欽順顧憲成高攀龍五人行誼而兼及其言論大旨主於攻

擊陸王

靜用堂偶編十卷

兩江總督
採進本

清涂天相撰天相字燮菴號存齋一號迂叟孝感人
康熙癸未進士官至工部尚書天相從熊賜履講學
所著有謹庸齋劄記守待錄存齋閒話等書茲編又
從諸書之中撮其大略上編為學言政言學辨凡五
卷下編為家訓幼儀雜箴雜銘雜誠古今體詩存齋
詩話亦五卷

筆記二卷

湖北巡撫
採進本

清程大純撰大純字漢舒孝感人康熙中由貢生官

黃岡縣教諭是書皆講學之語其謂陸王之學雖矯枉過正然用以救口耳之學不爲無功所見頗爲平允若以程子配孔子朱子配孟子則聖賢之於大儒自有分際未必二子所敢居矣

倭情考略一卷

兩淮鹽政
採進本

明郭光復撰光復武昌人官揚州府知府考萬歷己丑進士別有一郭光復順天固安人官至右副都御史遼東巡撫姓名偶同非一人也嘉靖中東南屢中倭患而揚州當江海之衝被害尤甚光復以爲必得

其情始可籌備禦之術因攷次所聞爲此編首總論
次事略次倭患次倭術次倭語次倭好次倭船次倭
刀載其情狀頗詳蓋亦知己知彼之意而得諸傳聞
未必一一確實也

象緯彙編二卷

浙江范懋柱家
天一閣藏本

明韓萬鍾撰萬鍾蘄州人是書成於嘉靖壬辰採丹
元子步天歌逐段分釋並爲之圖以馬氏通考所記
彗孛客流陵犯之屬分隸各星之下合三垣二十八
宿爲三十一條而五緯附於其後其自序謂便學者

之考索非有所作大概與天元玉歷相同蓋當時未
覩官本故又爲此哀輯耳

性理三書圖解九卷

江蘇巡撫
採進本

明韓萬鍾撰萬鍾有象緯彙編已著錄此云三書者
易學啟蒙律呂新書洪範皇極內篇也皆本無性理
之名萬鍾蓋以永樂中修性理大全載此三書故從
其後而追題之也原序稱其於啟蒙有主遇卦之卦
之殊於律呂有管孔之異於皇極辨止戒之譎明象
占之義今案其書於啟蒙考變占之三十二圖每爻

必自一爻變至六爻皆變者依爻位逐次列之而各繫爻辭於下蓋本之韓邦奇啟蒙意見殊爲繁複其於遇卦之卦並無發明律呂管孔仍徑一圍三最疏之率亦毫無是正至燕樂字譜大呂太簇夾鍾清各用五字而以上下緊別之蓋唐宋相傳之舊法所以取夾鍾爲二十八調之準萬鍾於四清祇列黃太夾而遺大呂清聲又云旋宮之法未考是其於燕樂尙茫然無據何論雅樂耶皇極內篇係分之八戎小數縱橫當以悔凶休祥平災咎吉吝爲次刊本誤以止

之縱數列爲戒縱萬鍾據數正之則所考良是然蔡
沈此書非聖人而作易御定性理精義已以僭經斥
之世亦無用以占者其謬否正無庸深辨耳

地理大全一集三十卷二集二十五卷

通行本

明李國木撰國木字喬伯漢陽人是書一集之一卷
二卷爲郭璞葬經三卷至六卷爲唐邱延翰天機素
書七卷至十卷爲楊筠松撼龍經疑龍經葬法倒杖
十一卷至十四卷爲宋廖瑀九星穴法十五卷爲蔡
元定發微論十六卷爲明劉基披肝露膽經十七至

三十卷爲搜元曠覽稱遯菴彙古者國木自撰也二
集一卷爲唐曾文迪青囊序二卷爲楊筠松青囊奧
語三卷至六卷爲楊筠松天玉經內傳外編七卷至
十一卷爲元劉秉忠玉尺經附遯菴原經圖說十二
卷至十四卷爲宋賴文俊催官篇附遯菴理氣穴法
十五十六卷爲宋吳克誠天玉外傳四十八局圖說
十七卷至二十五卷爲索隱元宗亦國木自撰是書
凡例一集專論巒頭二集專論理氣以多爲富真偽
錯糅又國木自撰附圖附說者居其半陳因泛衍絕

無取裁如玉尺經向稱劉秉忠著已屬傳會是書標
題爲陳希夷著劉秉忠集跋云與師友講論已成一
帙幸得伯溫先生原本與予註若出一揆因爲補其
闕遺仍附圖說乃知所謂劉註卽國木假爲之以欺
世也每卷首率題李某刪定是卽其所集諸家之書
亦已多所竄改矣

相掌金龜卦一卷

永樂大典本

舊本題鬼谷子撰其法用草一莖五指各自尖量至
窮坑復自拇指比至中紋逐一截斷排列成龜用以

推斷其成格左右手共圖三十四以格之全與不全
判人禍福蓋俚俗猥鄙之談託之古人也

貴賤定格三世相書一卷

永樂大典本

舊本題鬼谷子撰其法以十二辰分屬貪狼巨門廉
貞武曲破軍文曲祿存而各爲之像又冠帶臨官帝
旺諸星亦有像蓋術數家之俚淺者也

夢林元解三十四卷

兩淮鹽政
探進本

明陳士元撰何棟如重輯士元有易象鉤解棟如有
明祖四大法皆已著錄士元初作夢書元解棟如因

而廣之分夢占二十六卷夢禳二卷夢原一卷夢徵
五卷前有凡例稱是書在宋景祐閒名圓夢祕策爲
晉葛洪原本而宋邵雍輯之者其言無可證據又有
孫奭序一篇辭氣纖俗蓋術家依託之文士元等不
及辨也

雪堂墨品一卷

內府藏本

清張仁熙撰仁熙字長人號藕灣廣濟人是編乃宋
犖爲黃州通判時仁熙品其所藏之墨以漫堂墨品
所紀年月推之蓋作於康熙辛亥自方中正牛舌墨

以下凡三十六種意以配蘇軾雪堂試墨三十六丸也

茶約一卷

兩淮鹽政採進本

明何彬然撰彬然字文長一字甯野蘄州人是書成於萬歷己未略倣陸羽茶經之例分種法審候採擷就製收貯擇水候湯器具醞飲九則後又附茶九難一則

觴政一卷

內府藏本

明袁宏道撰宏道字無學公安人萬歷壬辰進士官

至吏部稽勲司郎中事蹟具明史文苑傳是書紀觴
政凡十六則前有宏道引語謂採古科之簡正者附
以新條爲醉鄉甲令朱國楨湧幢小品曰袁中郎不
善飲而好談飲著有觴政一篇卽此書也

內外篇二卷

安徽巡撫
採進本

明周宏祖撰宏祖字少魯麻城人嘉靖己未進士官
至南京光祿寺卿事蹟具明史本傳是編內篇所論
皆性命道德事多剽竊老莊之旨外篇則自天文地
理錢穀甲兵皆各有論然皆略涉藩籬不能得其精

要也

海蠡編二卷

浙江巡撫
採進本

明袁士瑜撰士瑜號七澤公安人卽宗道宏道中道
之父也其書大旨以儒釋二家同源異派或援釋疏
孔或證孔於釋謂濂洛諸儒於聖人書詮釋妙暢如
樽注海是編如蠡注海故名海蠡編開卷釋明德謂
明德卽是良知德卽是明不可以明更求於明朱子
註爲虛靈不昧最妙又謂善何以曰至佳於惡固非
至善住於善亦非至善善惡兩邊俱不倚是何境界

所謂至善也但起心動念便不是止起心動念不屬善邊便屬惡邊便不是至善息機忘見便是止於至善皆本釋氏之虛寂與無善無惡之說而曼衍之蓋沿姚江末流而變本加厲者耳

何之子一卷

浙江巡撫採進本

明周宏禴撰宏禴字元孚麻城人萬歷甲戌進士官至尙寶司少卿事蹟附見明史李沂傳是編乃其初謫代州州判時所作汝南吳同春序稱其語似關尹子然九流競起雖多以怪譎爲宗要無不可尋文索

解宏禴此書乃以常詞故爲澀體其命名之義似取
禮記儀儀何之之語已爲好異至如書中太虛奚無
無以無無無無無則無無無則虛虛虛則實實
實則極極極則易易易則始諸語殆至不可句讀則
尤爲無取矣

三一子無卷數

檢討蕭芝
家藏本

明程德良撰德良字凝之號雲連雲夢人萬歷癸未
進士官崇信縣知縣雲夢縣志載所著有不波館正
續集白蓮泐代豆日鈔明文覽諸書今皆不傳傳者

惟此書前有自序謂是書作於宰崇信時若三才一人焉則吾豈敢若三不朽而居一焉則亦不敢第次三篇而名曰三一子三篇以立德立功立言爲序其大旨亦欲合儒釋而一之

時習新知六卷

山東巡撫採進本

明郝敬撰敬有周易正解已著錄是書舊名知言敬於萬歷壬辰官永嘉時自爲之序後改今名復於萬歷己未及崇禎戊辰爲自序二首凡初篇三卷中篇二卷後篇一卷閱三十年而成自序謂早歲出入佛

老中年依傍理學垂老途窮乃輸心大道書中於周子太極圖說張子正蒙邵子皇極經世及二程子朱子無不肆言詆斥謂宋儒設許多教門主靜持敬操存省察致知窮理專內疎外舉體遺用爲浮屠之學又謂世儒先知後行以格物爲窮理以聞見爲致知皆非是卽王守仁知行合一致知格物之說然旣借姚江之學以攻宋儒而又斥良知爲空虛以攻姚江亦可謂工於變幻者矣

常談考誤四卷

浙江鮑上恭家藏本

明周夢陽撰夢陽有水部備考已著錄是書卷首諸序皆稱常談考誤而其書題曰青谿山人文集以常談考誤爲子目蓋其初別行後又編入文集也其言皆辨世俗引用典故之譌而援據頗爲寒窘亦多舛誤又有不必辨而辨者如辨青雲非聖賢元語卽仙隱蹤蹟今乃謂登科入仕爲青雲者誤是不知史記范睢蔡澤傳須賈有致身青雲之上語也謂程子表章大學中庸朱子合以論語孟子謂之四子宋時尚未以四書名是併真德秀四書集義未見也又謂明

太祖以五經四書取士四書之名自此起是併元史
選舉志未見也至辨太學石鼓非落星所化道士所
居不可稱方丈尤嫌猥陋如爲讀書人辨則讀書人
無謬至此者如爲不讀書人辨里巷譌傳觸耳皆是
如劉克莊所謂滿村聽唱蔡中郎者可勝與辨乎

讀書考定三十卷

浙江巡撫
採進本

明陳良儒撰良儒字稗修湖北人崇禎中由蔭生官
光錄寺典簿是書分天象時令地輿人物仕籍行誼
肖貌人事書籍法教方伎宮室飲食服飾器用花木

品彙凡十七門每類徵引舊聞訂其譌舛亦容齋隨筆之支流然大抵多前人所已言如唐明皇遊月宮及月中嫦娥之類不過詩賦家藉爲詞藻本無人以爲實事亦無庸紛紛詰辨也

太岳雜著一卷

兵部侍郎紀昀家藏本

明張居正撰居正有書經直解已著錄是編多論古之語而於明代掌故尤詳亦兼及醫方雜事其中如廣寒殿樑上拆得至元通寶錢知爲元造而非遼造朱彝尊曰下舊聞引爲考證亦閒有可採中有其子

懋修跋稱殿閣學士之設在洪武革丞相後不始於
永樂天下知府有上中下三秩從三品正四品從四
品之不同爲鄭曉王世貞諸書所未知然洪武中設
殿閣學士皇甫錄明記略已載之錄書成於嘉靖壬
寅在居正前懋修蓋未詳考其論趙蓋韓楊一條最
爲平允而卒之以傲很掇禍乃與所言相反其論古
人惟心服張詠而頗斥南宋諸儒之迂然至詆周公
爲多事則妄矣其論周初禮樂尙質一條隆慶辛未
主會試以先進於禮樂命題卽用其意作程文未免

偏論至於謂大臣子弟當以科第進身不必避與寒士爭進之嫌則全爲其子殿試第一而發益出私心矣此書本載太岳集中此本乃崇禎癸未德州盧世濯錄出別行今亦併存其目焉

黃帝祠額解一卷

兩江總督
採進本

明李維楨撰維楨有史通評釋已著錄是書乃其奉詔謁黃帝陵見舊祠取鼎湖之事額曰龍髯乃作是書以辨其不經謂騎龍卽乘六龍之義其實子華子已有是說無庸復贅又舉百家所言黃帝神靈諸事

一一駁詰詞極辨博實亦司馬遷五帝本紀文不雅

馴薦紳難言之緒論也

瓶花齋雜錄一卷

編修程晉
芳家藏本

明袁宏道撰宏道有觴政已著錄此書多記聞見雜
事及經驗醫方間及書傳持論亦多偏駁如孟子說
性善及儒與老莊同異諸條第喜逞才辨不自知其
言之過也

讀書偶然錄十二卷

兩淮馬裕
家藏本

清程正揆撰正揆字端伯孝感人前明崇禎辛未進

士官尙寶司卿入清授光祿寺丞官至工部侍郎是
編乃其讀書劄記議論考證兼而有之閒出新意而
頗不免踳駁如以武王上祭於畢爲畢星引蘇竟傳
爲證未免牽合論聯句詩二條一以爲始於柏梁一
以爲起於式微一書之中自相矛盾又解杜甫丹青
引據先帝天馬玉花驄句以爲至尊含笑圍僕惆悵
乃深譏肅宗不軫羹牆之念而斥舊說之非則不考
明肅代三朝受終年月而臆爲穿鑿尤固於說詩矣

百子咀華十四卷

兩江總督
採進本

明胡效臣編效臣字鍾衡黃州人萬歷丙子舉人官旌德縣知縣是書取諸子之文而割裂之或摘其一
段或拾其數語或撮其數字以供時文獮祭之用首
列左傳次六子次子彙次則以儒家道家法家兵家
分類又以明人所著參錯於古人之中不知其體例
何在又題曰焦竑批評竑之陋何至於此其依託可
不問而知也

智品十三卷

安徽巡撫
採進本

明樊玉衡撰於倫補葺玉衡字元之萬歷乙未進士

官崑山縣知縣倫字愔之萬歷辛丑進士官至右通
政皆黃岡人是編蒐輯古初至明代用智之事分爲
七門一曰神品察兆於未萌者也二曰妙品知幾於
將至者也三曰能品救敗於已然者也四曰雅品端
士之善應變者也五曰具品小才之偶見長者也六
曰譎品純任術者也七曰盜品陰賊害正者也雜隸
古事而皆不著其所出如趙簡子欲殺孔子之事出
宋人僞子華子管仲諸事出管子輕重諸篇詞皆依
託而信爲實然未免失於考證又輔過絺疵得列神

品與大禹同科而文王周公乃僅入妙品殊為倒置
至竇良女蠟書滅賊厥志可尚而乃列之盜品中尤
乖刺矣

合刻五家言無卷數

安徽巡撫採進本

明鍾惺編惺有詩經圖史合考已著錄是書一曰道
言凡十二卷即文子也二曰德言分上下二卷即劉
晝新論也三曰術言即鬼谷子也四曰辨言即公孫
龍子也五曰文心雕龍凡十卷各書俱有專行之本
不可強合而別立標題務為詭異可謂杜撰無稽矣

鹽邑志林六十二卷

浙江巡撫
採進本

明樊維城編維城黃岡人萬歷丙辰進士崇禎中以
福建按察司副使家居張獻忠陷黃州抗節死事蹟
附見明史樊玉衡傳是編乃維城官海鹽縣知縣時
輯海鹽歷朝著作共爲一集凡三國三種晉二種陳
一種唐一種五代一種宋三種元一種明二十九種
其中如陸績易解之類多出鈔合明人所著又頗刪
節大抵近說郭之例其最舛謬者莫如顧野王之玉
篇廣韻直音玉篇自唐上元中經孫強增加宋人又

有大廣益會之本久非原帙舉今本歸諸野王已爲
失考又玉篇自玉篇廣韻自廣韻乃併爲一書尤爲
舛謬且玉篇音用翻切並無直音之說忽以直音加
之野王更不知其何說考首卷訂閱姓名列姚士舜
鄭端允劉祖鍾三人士葬固當時勝流號爲博洽者
也何其誤乃至於是哉

檢心集十四卷

湖北巡撫
採進本

清閔則哲撰則哲字睿先應山人是集爲其子衍所
編以語錄講義雜著與雜文參錯成書頗無條理其

有書名者爲說書管見四卷又說書一卷訂學膚言
二卷其不能以一卷者曰寬酌篇敢問篇偶及篇經
說略史說略子說略仕語節錄論兵摘略遷議存彙
惕愆質語節錄內則續言蕉窻筆談餘皆雜文其中
論說旣繁不免小有牴牾如史說略中引史記桀觀
炮烙於瑤臺云云乃符子之寓言史記實無此文也

姓匯四卷

浙江汪啟淑家藏本

明陳士元撰士元有易象鉤解已著錄是編乃其歸
雲集中之一種故標曰別集其說謂姓氏之源由來

已久因推本於五帝分列世系兼綜而條貫之然大
槩鈔撮氏族略之文鮮有考訂夫自有天地卽有君
民據姓氏書所說無不出自神明之後卽至微者如
倉庾之類亦出世官然則洪荒以後秦漢以前其庶
人皆後嗣歿絕乎是正可姑妄言之姑妄聽之耳而
士元又捨其餘唾著爲此書是亦不可以已乎

姓臚十卷

浙江汪啟淑家藏本

明陳士元撰是編亦其歸雲別集之一種摭摭姓氏
諸書依韻編輯略載源流支派凡平聲一千七百一

十四姓上聲六百八十九姓去聲六百一姓入聲六百二十一姓外蕃九十九姓不入韻中共三千七百二十四姓徵引寡陋且多疎舛又在凌迪知萬姓統譜之下

疆識略四十卷

內府藏本

明吳夢材編夢材字國賢崇陽人其書分三十九類類各一卷惟雜志分上下二卷皆剽剗類書略爲聯貫成文弇陋殊甚卷端刻王世貞批二行云疆識略奇書也梓之必傳第入梓時不可不更詳慎則世貞

已婉諷之矣何夢材不悟猶引以爲重耶

春秋內外傳類選八卷

江蘇巡撫採進本

舊本題明進士楚潛樊王家撰其始末無考太學進士題名碑萬歷癸未有三甲進士樊王家湖廣潛江人當卽其人也其書以左傳國語各標題目分編二十三門以備時文之用閒旁註音訓一二字亦皆淺陋與經學毫無所關而又非文章正宗選錄左傳之例無類可附姑從其本志入之類書類焉

茹古略集三十卷

浙江巡撫採進本

明程良孺撰良孺有讀書考定己著錄是書三十卷
凡三百九十四篇每篇皆採擷藻麗之詞聯爲偶語
其體全同事類賦自序稱不奇不已不幽不已不僻
不已不合其奇者幽者僻者以成一家言不已然觀
所徵引實了不異人也

名物考十卷

內府
藏本

明劉侗撰侗有帝京景物略已著錄是書分二十三
部附物理考通微志二篇皆採輯類書而成卷帙無
多搜羅甚隘不足以供考核也

王氏雜記十四卷

浙江巡撫
採進本

明王兆雲撰兆雲有詞林人物考已著錄是編凡湖海搜奇二卷揮麈新談二卷白醉瓊言二卷說圃識餘二卷漱石閒談二卷烏衣佳話四卷皆雜記新異之事本各自爲書後人哀爲一帙總題曰王氏雜記非其本名也其中烏衣佳話明史藝文志作八卷此本僅前後二集每集分上下卷或爲合併或爲闕佚均不可知然志怪之書無關學問其完否亦無容深考惟其中記張孚敬晚遇一條謂廷臣議追封大禮

道德經說奧二卷

兩江總督
採進本

舊本題朱孟嘗撰附刻朱翊鈺廣讌堂集後明宗室
命名每府以二十字為次其下一字則偏旁取五行
相生此曰孟嘗蓋其字號惟未審即翊鈺作或其子
孫所作耳其書於每章之後寥寥各贅數言殊未盡
老氏之旨

玉洞藏書四卷

浙江巡撫
採進本

明李堪撰堪號楚愚應城人書首何思沛序稱其屢
失利於棘闈則嘗為諸生也是書成於萬歷壬子前

二卷取宋張伯端悟真篇句爲箋釋而附以諸仙修煉之說後二卷則註漢魏伯陽參同契三相類其以三相類爲淳子叔通作用楊慎本也

含素子塵譚十卷

江西巡撫採進本

明朱清仁撰清仁號懷白別號含素子黃州人流寓南昌爲道士此書分條劄記而以類分爲十篇曰行品曰元真曰聖居曰佛說曰審世曰博論曰迂言曰地形曰雜記曰疣批疣批卽諸篇之自評彙之於末其實九篇也其說有頗切事理者然大旨出於黃老

艾南英序取其闢佛然清仁爲道士自爭釋老之勝負非儒者之闢佛其地形一篇雜採山海經神異經及道家附會之說繪爲地圖尤爲謬誕

四庫湖北先正遺書存目卷三

沔陽盧弼輯校

四庫湖北先正遺書存目卷四

沔陽盧靖輯刊

集部

楚辭章句七卷

山東巡撫
採進本

清劉夢鵬撰夢鵬有春秋義解已著錄是書就諸本
字句異同參互考訂亦頗詳悉然不註某字出某本
未足依據至於篇章次第竄亂尤多如二卷九歌內
湘君湘夫人大司命少司命本各自標題而刪除湘
夫人少司命之名稱湘君前後篇司命前後篇六卷

九章內刪抽思橘頌之目統爲哀郢又移置其先後均不知何據又誤以史記敘事之文爲屈平之語遂合漁父懷沙爲一篇刪去漁父歌而增入乃作懷沙之賦其辭曰九字尤以意爲之也

黃樓集二卷

兩淮馬裕家藏本

明魯點編胡廷宴補點有齊雲山志已著錄廷宴漳州人點書成於萬歷甲辰廷宴補刊則在丁未相距二三年而廷宴序稱歲久浸壞漸以失次殆不可曉蓋明代朝覲官入都例以重貨賂津要其餘朝官則

刊書一部佐以一帕致餽謂之書帕其書卽謂之書帕本其倉卒不暇自刊者則因舊官所刊稍改面目而用之動以舊刊漫漶爲詞而偶忘其相去不久也宋熙甯十年蘇軾守徐州值河決澶淵南溢於泗城幾沒軾捍禦百方城以無恙乃取土剋水之義卽城東門爲樓堊以黃土名曰黃樓其弟轍及秦觀皆爲之賦陳師道爲之銘軾亦有九日黃樓黃樓觀月諸詩遂爲古蹟點官徐州因哀軾詩文作於徐州者爲一集題曰黃樓集實非皆爲黃樓作也入之地理名

實不倫今仍入之別集附軾集後焉

林泉結契五卷

編修汪如藻家藏本

宋王質撰質有詩總聞已著錄是編乃商邱宋舉摘

紹陶錄中山友辭山友續辭水友辭水友續辭山水

友續辭各為一卷謂其有玩物適情之趣改題此名

其文則無所增損也

程梅軒集四卷

湖北巡撫採進本

元程從龍撰從龍字登雲別號漢章嘉魚人自元末

隱居教授入明仍不仕以終是集為其孫鑑所編前

有其門人李德庸序及從龍小傳又有王進王愷二
序及鑑跋皆永樂中所作鑑跋稱從龍著作散佚所
存惟此前三卷凡賦二首詞七首餘皆古今體詩後
一卷爲雜文僅八篇詩文皆清而過淺未足抗行於
作者之間

李大崖集二十卷附錄一卷

浙江孫仰
曾家藏本

明李承箕撰承箕字世卿嘉魚人讀書大崖山自號
大崖居士成化丙午舉人嘗徒步至嶺南從陳獻章
游及歸遂隱居黃公山不復仕進明史儒林傳附載

於獻章傳末是編乃其弟立卿所刻明史藝文志載
大崖集二十卷與此本合前十二卷爲詩後八卷爲
雜文附錄一卷則墓表行狀及陳獻章所贈詩文前
有其兄承芳所作采菊橐引采菊橐者卽獻章所贈
古詩凡十三首裝潢成卷以其首句有采菊二字因
以名焉然此宜入附錄乃以冠諸簡端蓋欲假獻章
以重承箕殊非體例且重不重繫乎其人亦不繫乎
其師也

西巡類纂八卷

浙江范懋柱家
天一閣藏本

明吳廷舉撰廷舉字獻臣梧州人成化丁未進士官
至南京工部尙書諡清惠事蹟具明史本傳此集乃
其正德初官廣東按察司副使時巡歷省治以西諸
郡所上奏疏及往來文牘詩詞之類故曰西巡類稿
明史言其發中官潘忠罪爲忠反訐下詔獄劉瑾矯
詔枷之幾死今觀此編廷舉所上凡十疏內有劾岷
王府內監陳鶴稱令旨差往廣東違法乘驛騷擾又
奏各省鹽務差內監查盤者因斂銀內進又有人事
銀以賄各衙門賀禮銀以賄司禮監此三者並科擾

百姓請敕御史體察而盤查廣東鹽庫之內監韋霖
將鹽課盡解京令廣東無以充軍餉其事不可行其
關涉於內官者不過如此無發潘忠罪事編首有劉
瑞序云逆瑾切齒於君其黨探望風旨誣奏卽械下
錦衣衛獄枷吏部門左垂死而後釋之瑞廷舉同時
人其言必得實然則史傳疑誤也

東嶠集十五卷

湖北巡撫
採進本

明李承芳撰承芳字茂卿嘉魚人宏治庚戌進士官
大理寺評事明史儒林傳與其弟承箕同附陳獻章

傳末是集詩多俚俗如詠馮道云地獄剉燒春磨具
定將此賊謝天人白頭吟云恨殺相如非正氣未曾
焚却白頭吟皆墮入下劣詩魔文亦拙澀曾璵序謂
其識類許魯齋志類范叔子睦族類范文正而詩文
則甚自類蓋譏其無所師法也

魯文恪存集十卷

浙江孫仰曾家藏本

明魯鐸撰鐸字振之號蓮北景陵人宏治壬戌進士
官至南京國子監祭酒卒贈禮部侍郎諡文恪事蹟
具明史本傳是編爲其子彭嘉所編前四卷皆詩第

五卷爲使交彙鐸官編修時嘗奉使安南故也第六卷以下爲雜文史稱鐸爲司業日與祭酒趙永皆李東陽門生也東陽生日相約以二帕爲壽索笥無有有乾魚食過半矣乃攜其半饋東陽云云案司業秩六品何至貧不能具二帕無帕可徒往何必以食殘之物爲敬皆於事理爲不近此殆世人欲著其清介故甚其詞史因而錄之然亦足見其素行孤高故致影造是語不能不謂之賢者也至於詩文則皆不甚擅長蓋其平生志趣不在於斯耳

康谷子集六卷

湖南巡撫
探進本

明劉養微撰養微字敬伯廣濟人是集前三卷為樂府及詩四卷則其說鈴及自譜四則其詩宗李夢陽而才力薄弱頗窘於邊幅其說鈴內極推夢陽謂古色過於子美未免為偏好之言五卷以下附其弟養言詩文及其遠祖天行文煥等傳又附劉秉鈇石浪詩鈔劉醇駿盟鷗集劉鵬化味閒軒遺藁數種皆寥寥數篇姑備劉氏一家之書而已

陽峰家藏集三十五卷

浙江孫仰
曾家藏本

明張璧撰璧字崇象石首人正德辛未進士官至禮部尚書東閣大學士謚文簡是集爲璧居內閣時所自編首以經筵講章及議典禮之文次爲應制諸詩及誥敕賦頌表疏次爲古今體詩及雜文璧當夏言嚴嵩相持之時入閣不及一年而卒明史不爲立傳其人蓋無所短長者今觀其詩文殆亦如其爲人焉

節愛汪府君詩集二卷

浙江范懋柱家天一閣藏本

明汪文盛撰文盛字希周崇陽人正德辛未進士除饒州推官入爲兵部武選司主事諫南巡廷杖嘉靖

明朱廷立撰廷立有鹽政志已著錄是集凡詩四卷
文四卷其門人兵部尙書劉體乾撰墓誌稱其學出
於姚江而擠之者復出自姚江之流今其文集內推
尊王守仁甚至而詩集中東隣女西隣婦二首詳其
詞意實有所託諷意卽指所謂擠之者歟講學而至
相傾軋不知所講何學也

王鳳林文集四卷詩集三卷

浙江汪汝
璫家藏本

明王從善撰從善字承吉號鳳林襄陽人嘉靖癸未
進士官吏部考功司主事是編乃其子之瑞所編多

牽率應酬之作千頃堂書目不著錄殆偶未見歟

少泉集三十三卷

浙江孫仰曾家藏本

明王格撰格字汝化京山人嘉靖丙戌進士改庶吉士出爲分巡河北道按察司僉事世宗南巡坐行宮火杖黜隆慶初授太僕寺少卿致仕明史文苑傳附見王廷陳傳末千頃堂書目載格少泉集十卷今考此本凡詩選十卷詩續選八卷詩新選六卷文選五卷續文選四卷共三十三卷黃虞稷蓋僅得其詩選著錄也朱彝尊靜志居詩話稱其信口矢筆合作者

寡今考王世貞序云公於意非不能深不欲使其淫
於詩之外於象非不能極不欲使其游於見之表才
不可盡則引矩以圍之亂不勝靡則爲質以禦之詳
其語意殆亦微詞也歟

太岳集四十六卷

浙江巡撫
採進本

明張居正撰居正有書經直解已著錄神宗初年居
正獨持國柄後毀譽不一迄無定評要其振作有爲
之功與威福自擅之罪俱不能相掩至文章本非所
長集中奏疏啟劄最多皆在廟堂時論事之作往往

縱筆而成未嘗有所鍛鍊也

江右詩稿二卷

浙江汪汝璩家藏本

明李允芳撰先芳有讀詩私記已著錄宋弼山左明詩鈔稱其有李氏山房詩錄不著卷數邗侗來禽館集有先芳行狀稱所著東岱山房稿三十卷此集總題爲東岱山房詩錄而子目則作江右詩稿蓋其集中之一種嘉靖戊申知新喻縣時作也嘉隆詩社先芳首倡厥後王李踵興遂擯斥先芳不與七子之列繼以先芳憤激乃收之廣五子中于慎行稱其詩與

李攀龍異曲同工邢侗亦稱歷下名愈高濮陽苦爲
所掩然修戈倚耒嘗一日忘于鱗今觀其詩才力
實出攀龍下慎行等以鄉曲情均不欲分左右袒耳
明末攻七子者遂欲以躋攀龍之上非篤論也

李氏山房詩選六卷

江蘇周厚
堉家藏本

明李先芳撰此本乃皇甫汈所選分體編次亦間有

評語

雲山堂集六卷

浙江孫仰
曾家藏本

明魏裳撰裳字順甫蒲圻人嘉靖庚戌進士官至濟

南府知府明史文苑傳附載王世貞傳中是集前三卷皆詩後三卷爲雜文當嘉隆之際李攀龍王世貞方負盛名而裳與南昌余曰德德甫銅梁張佳允甫新蔡張九一助甫實左右之當時稱爲四甫裳才地稍弱尤爲墨守不變集首佳允序謂其文非左國兩司馬詩非建安大歷則不以寓目此卽其力持王李餘論之證故世貞藝苑卮言亦稱其不失門宗云

甌甄洞稿五十四卷續稿二十七卷

山東巡撫採進本

明吳國倫撰國倫有陳張本末略已著錄初國倫爲

兵科給事中時以倡衆賻楊繼盛忤嚴嵩左遷世稱其義在後七子中最爲老壽初與王世貞李攀龍唱和後與李維禎汪道昆輩狎主詩盟其著述頗富然在當時胡元瑞作詩藪已譏其用句多同一篇而外不耐多讀清朱彝尊靜志居詩話亦謂王李旣沒甌甄幾與四部爭富而海內之爲真詩者寡則文章不逮其行誼矣此甌甄洞稿國倫所手定續稿則其子士良所校刊明史藝文志此二集外又載其詩稿十五卷今未之見意其散佚歟

蘇山集二十卷

兩淮鹽政
採進本

明陳柏撰柏字子堅一字憲卿沔陽人嘉靖庚戌進士官至井陘兵備副使是集凡詩十卷文十卷詩頗宕逸有姿而失於薄弱文又不及其詩千頃堂書目別載柏見南山集八卷不載此集殆偶未見歟

蘇山選集七卷

浙江巡撫
採進本

明陳柏撰是集為莆田黃謙所選定凡詩四卷文三卷千頃堂書目作五卷傳寫誤也

耿天臺文集二十卷

湖北巡撫
採進本

明耿定向撰定向有碩輔寶鑑要覽已著錄是集爲其門人劉元卿所編凡詩賦一卷雜文十九卷末一卷爲時藝蓋用宋文鑑收張才叔經義例也定向之學歸宿在王守仁故集中第十三卷以薛瑄諸人爲列傳而以守仁爲世家此蓋陰用史記孔子世家之例不但以守仁封新建伯也黃宗羲明儒學案列之泰州王艮派下摘其與張居正論趙用賢吳中行等書以爲雖欲少殺其禍亦近於誦六藝以文姦言又摘其劾御史王藩臣疏以爲鉗制言官考與居正書

在第六卷中核其詞意蓋求寬言者之罰不得不先解居正之怒求解其怒不得不先順其意而使之喜

於是借伊尹之任以獻諛頌遂爲天下口實

案明史定向本

傳稱居正奪情定向貽書友人譽爲伊尹而貶言者時議訾之蓋偶未檢此集誤以與居正爲與友人謹附識於此糾王藩臣疏今在第二卷中大旨愠藩臣劾巡

撫周繼未以揭帖送都御史使藩臣所劾不實定向

糾其妄奏可也乃因遺誤送揭閱一月之後始糾其

不實此爭私憤非爭公論矣顧允成作客問以詰定

向定向不能答厥有由歟大抵定向之學兼講作用

觀其全集大略可知宗義所論雖責備賢者之言要不可謂之無因

二酉園詩集十二卷文集十四卷續集二十三卷

湖北巡撫

探進本

明陳文燭撰文燭字玉叔沔陽人嘉靖乙丑進士官至南京大理寺卿其詩分八集曰漢陰詩曰廷中詩曰淮上詩曰嵩和詩曰西蜀詩曰東岱詩曰金焦詩曰黃蓬詩陳思育王喬桂皇甫沔袁福徵黃省曾沈明臣李先芳孫斯億任瀚高啟愚熊敦朴陳宗虞曾

可耕吳國倫方沈黃一正李維楨屠隆周光鎬十九
人序之文曰五岳山人前集五岳山人後集王世貞
歸有光汪道昆茅坤序之後總編爲二酉園文集道
昆世貞又序之續集則文燭身後其孫之蘧所輯皆
文無詩亦無當時名士序惟之蘧自序之又與文燭
之壻龍膺各爲一跋而已斯亦生死之際交遊盛衰
之驗而文壇標榜其不足盡據可知矣

大泌山房集一百三十四卷

安徽巡撫
探進本

明李維楨撰維楨有史通評釋已著錄是集詩六卷

雜文一百二十八卷而一百二十八卷之中世家傳誌碑表行狀金石之文獨居六十卷記載之富無逾於是然率率之作過多不特文格卑冗並事實亦未可徵信明史文苑傳稱維楨爲人樂易闊達賓客雜進其文章宏肆有才氣海內請求者無虛日能屈曲以副所望碑版之文照耀四裔門下士招富人大賈受取金錢代爲請乞亦應之無倦然文多率意應酬品格不能高也朱彝尊明詩綜亦謂本甯著作如官廚宿饌麤鹿肥麋雖牯脯具陳鱸葦雜進無當於味

今核是集知非故爲詆毀矣

廣讌堂集二十四卷

兩淮鹽政採進本

明樊山王朱翊鉞撰翊鉞字匡鼎自號隱真子荆王
瞻峒六世孫萬歷庚子襲封其父載岑以文行稱翊
鉞世其家學與弟翊鏗皆好爲詩兄弟嘗共處
一樓號花萼社楚藩多強橫樊山一派其最文雅者
也是集賦及三言四言詩共一卷五七言古今體詩
共二十二卷長短句一卷大抵多近香山之派末有
道德經說與二卷題曰朱孟嘗撰蓋亦楚宗是以附

錄與詩集爲不倫今別入子部道家類焉

鄒孚如集無卷數

浙江巡撫
採進本

明鄒觀光撰觀光字孚如雲夢人萬歷庚辰進士官
至南京兵部郎中擢太僕寺少卿未上而卒是集皆
雜文無詩前無序目版心亦不刊卷次蓋未定之本
其文往往體近制藝蓋揣摩科舉先入者深觀其雲
夢儒學藏書記極論明人不務博學非久歷名場不
能言之如是切中也三楚文獻錄稱觀光與魏允中
顧憲成以文學經濟相砥礪在吏部發諸吏增減文

書拜官事抵罪者數百人一洗部弊因陳論不合乞
歸養事親十餘年始補南職方郎是其生平建豎固
不以詞章見長矣

玉堂遺稿無卷數

湖北巡撫
採進本

明蕭良有撰良有字以占號漢沖漢陽人萬歷庚辰
進士官至國子監祭酒良有在史局十五年長於當
時制誥之文規模宏敞有承平臺閣之體是集爲其
曾孫延昭等所編分類排比不分卷數未有補遺及
葉向高所撰墓誌一篇

中祕草三卷

湖北巡撫採進本

明李沂撰沂字景魯嘉魚人萬歷丙戌進士官至吏科給事中劾東廠太監張鯨廷杖削籍後贈光祿少卿事蹟具明史本傳是集皆其爲庶吉士時所作自記謂每月上旬中旬下旬試於翰苑者曰館草每月朔望試於東閣者曰閣草皆詳錄當時閣師館師評語末附載劾張鯨疏一篇及廷杖之後王錫爵楊起元袁黃通問三尺牘

小山草十卷

浙江巡撫採進本

明郝敬撰敬有周易正解已著錄是編首爲鰕生蠡管三卷首載闢佛書次則辨論經旨之文又雜著三卷尺牘一卷家乘三卷蓋其小山草堂全書之一種敬喜說經古文非所留意置之不論不議可矣

袁中郎集四十卷

兩江總督採進本

明袁宏道撰宏道有觴政已著錄其詩文所謂公安派也蓋明自三楊倡臺閣之體遞相摹仿日就庸膚李夢陽何景明起而變之李攀龍王世貞繼而和之前後七子遂以仿漢摹唐轉移一代之風氣迨其末

流漸成僞體塗澤字句鉤棘篇章萬喙一音陳因生
厭於是公安三袁又乘其弊而排抵之三袁者一庶
子宗道一吏部郎中中道一卽宏道也其詩文變板
重爲輕巧變粉飾爲本色致天下耳目於一新又復
靡然而從之然七子猶根於學問三袁則惟恃聰明
學七子者不過贗古學三袁者乃至矜其小慧破律
而壞度名爲救七子之弊而弊又甚焉觀於是集亦
足見文體遷流之故矣

四然齋集十卷

兵部侍郎紀昀家藏本

明黃體元撰體元字長卿穀城人萬歷甲辰進士官
至山東按察司副使是集體元所自編取中和集身
心世事謂之四緣委身寂然委心洞然委世混然委
事自然之語故以四然名齋因以名集蓋明季士大
夫耽二氏者十之九也

空華集二卷飲河集二卷止啼集一卷石頭菴集五卷

兩江總督
採進本

明釋如愚撰如愚字蘊璞江夏人祝髮後行脚四方
尋居金陵碧峯寺從詩僧洪恩學周汝登曹學佺袁

宗道兄弟皆與之遊是集凡四種初曰空華集詩二卷次曰飲河集詩二卷次曰止啼集文一卷次曰石頭菴集詩三卷文二卷明詩綜但稱有飲河石頭二集蓋未覩其全也據自序最後有寶善堂集今亦未見序言文無定質詩不必有唐文不必六經秦漢自許甚高然材地粗疎徒好爲大言耳

嶽歸堂集十卷

兩淮鹽政探進本

明譚元春撰元春字夏天門人天啟丁卯舉人明史文苑傳附見袁宏道傳中隆萬以後公安三袁始

攻擊王李詩派以清巧爲工風氣一變天門鍾惺更
標舉尖新幽冷之詞與元春相唱和評點詩歸流布
天下相率而趨纖仄有明一代之詩遂至是而極弊
論者比之詩妖非過刻也元春之才較惺爲劣而詭
僻如出一手日久論定徒爲嗤點之資觀其遺集亦
足爲好行小慧之戒矣

譚友夏合集二十三卷

安徽巡撫
採進本

明譚元春撰是編乃明季蘇州張澤合元春詩文而
刻之一卷至五卷爲嶽歸堂新詩六卷至十四卷爲

鵠灣文章十五卷至二十三卷爲嶽歸堂已刻詩選
每篇各有批評皆刻意摹倣元春語

譚子詩歸十卷

江西巡撫
採進本

明譚元春撰此集乃其選本題曰郟菴訂定不知何
許人前有自序并載諸稟自題之文如西陵草秋尋
草客心草之類凡十餘種蓋其詩之別刻者尙多云

徵古堂類彙十八卷

湖北巡撫
採進本

明陳文濤撰文濤字濤生廣濟人是集凡論六卷經
解二卷史議二卷子略一卷書序傳記誌林各一卷

詩二卷前有自序及徵古堂書目序列生平著述凡七十五卷謂諸書編輯成帙貲貧務謬不能悉以問世僅梓其略云云卽四卷至十一卷是也

青溪遺藁二十八卷

浙江孫仰曾家藏本

清程正揆撰正揆有讀書偶然錄已著錄是集凡詩十六卷文十一卷序一卷附奇夢錄一卷正揆少從董其昌游故頗工於畫集中亦多題畫論畫之作王士禎序稱其江山臥遊圖散在人間者有數百本土禎亦藏其二又有題正揆畫詩蓋當時亦重其筆墨

也其詩文則不出其鄉公安竟陵之習其浮記一篇
殆類小說奇夢記一卷益荒誕矣

白茅堂集四十六卷

湖北巡撫
採進本

清顧景星撰景星有黃公說字已著錄景星著述甚
富初有童子集三卷願學集八卷書目十卷皆崇禎
壬午以前作明末燬於寇顧氏列傳十五卷阮嗣宗
詠懷詩註二卷李長吉詩註四卷讀史集論九卷贖
池錄一百十八卷南渡集來耕集共七十三卷皆崇
禎癸未以後作康熙丙午燬於火僅南渡來耕二集

存十之三四乙酉丙戌之間又有登樓集避地泖澱
集亦皆散佚是集爲其子暢所輯而其子昌編次音
釋之凡賦騷一卷樂府一卷詩二十二卷文二十卷
景星記誦淹博才氣尤縱橫不羈詩文雄贍亦一時
之霸才而細大不捐榛楛勿翦其後人收拾遺藁又
不甚別裁傳毅之不能自休陸機之才多爲患殆俱
有焉

閻修齋稿一卷

湖北巡撫
採進本

清蕭企昭撰企昭有性理譜已著錄是集凡文三十

二篇前有其兄廣昭序述企昭始末甚詳企昭爲學之梗槩則見於與熊賜履書中蓋無所師承而篤志自立之士也然企昭雖尊法朱子排斥王氏而心平氣和無明人喧闐之習故與賜履書中有某平昔講學不欲立門戶肆口耳之語其東林要錄序曰當其始也出於士大夫意見之相岐聲名之相奪而其後也舉國家之大命隨之其同時尙論錄書後曰當日東林魏璫之門戶牢結而不可破一勝一敗正不敵邪遂至殺戮忠良剝削元氣感召災祲醞釀盜賊雖

正宗及宋金華歸震川文集又次之則其學問根柢
可見矣

藕灣全集二十九卷

湖北巡撫
採進本

清張仁熙撰仁熙有雪堂墨品已著錄其詩凡初集
十卷二集十卷餘九卷則文集也初集作於前明身
經離亂多悲苦之音大旨宗尙北地太倉歷下諸人
未脫摹仿之跡其論詩謂時弊雖深慎勿相救公安
救歷下至於桃竟陵救公安陷於虜其與王昊廬論
文書謂歸太僕之文秀善而衷於宋氏之理秀善則

易柔衷於宋氏則理信而詘於氣又謂瑯琊歷下與
毘陵歸安兩家角立毘陵歸安之流幾欲駕瑯琊歷
下而上之然徒以其秀善婉媚沓迤千里白葦平疇
者又安能服瑯琊諸君子制作諸大篇哉觀其持論
可知其生平宗旨矣

芝在堂集十五卷

湖北巡撫
採進本

清劉醇驥撰醇驥有古本大學解已著錄是集凡詩
六卷雜文九卷其自序云奉嘉隆閒二三名入集要
去其龔迹以近古爲是不能作宋元下廉纖支折語

又作鍾惺譚元春傳謂學王李未至襲風格備鏗鏘
猶俟諸三餘儉儒苦古帙浩繁便援公安竟陵而以
其竅鳴也觀其所論可知其所宗法矣

杞思堂文集八卷詩集一卷

湖北巡撫
採進本

清劉子壯撰子壯字克猷黃岡人明崇禎庚午舉人
困公車者幾二十年至順治己丑乃進士第一人及
第授翰林院修撰子壯制藝與熊伯龍齊名雄厚排
冢凌轍一切其詩古文亦以氣勝然精華果銳已銷
耗於八比之中又年僅四十四而卒未能於登第之

後復殫心於古學純以天資用事往往或失之麤豪
二其翼者兩其足予之角者去其齒固亦事理之恒
耳是編爲其孫永錫等所刻壽序賀序連篇累牘而
獨不載其對策恐所拾掇亦未必子壯意也

熊學士詩文集三卷

湖南巡撫
採進本

清熊伯龍撰伯龍字次侯號鍾陵漢陽人順治己丑
進士官至翰林院侍讀學士其古文較勝劉子壯詩
雖直抒胸臆而五言古體亦時有清古之音惟刊版
漫漶篇葉倒亂遂至於斷爛不可讀

鶴嶺山人詩集十六卷

浙江巡撫
探進本

清王澤宏撰澤宏字涓來黃岡人順治乙未進士官
至禮部尙書是集乃其子材振所編前三卷皆題已
刻詩若干首蓋皆澤宏舊作嘗爲魏憲錄入石倉詩
選者四卷以下用編年體自丁巳迄庚辰題某年詩
若干首附註曰未刻彙則材振所裒輯也前有魏憲
原序又附其祖用予傳一篇及澤宏請復九江關一
疏澤宏喜與諸名士游王士禎姜宸英洪昇等皆嘗
點定其詩所作類皆和平安雅不失臺閣氣象而骨

體未堅醞釀未厚尙不能凌轢一時

經義齋集十八卷

翰林院孔目熊志契家藏本

清熊賜履撰賜履有學統己著錄此集乃康熙庚午賜履以禮部尙書丁憂家居時所刻凡文十四卷詩四卷其名經義齋者聖祖仁皇帝所賜御題也

澡修堂集十六卷

兩江總督採進本

清熊賜履撰賜履既刻經義齋集又哀輯辛未起復及癸未致仕十三年中所作以成是編而書札獨多所題匾額對聯咸附載末卷澡修堂亦聖祖仁皇帝

御題之名故以名續集焉

突星閣詩鈔十五卷

檢討蕭芝家藏本

清王戩撰戩字孟穀漢陽人新城王士禎最稱其池陽山行長句以為突過歐陽修廬山高蓋士禎於歐詩不喜廬山高是以見有長句崛奇者即謂能過之其實未能也是集前有士禎序云出前後詩屬予論序而戩自跋云排續續集合前集共十卷其姪相跋云前五卷阮亭付梓後九卷朱愷仲董養齋所鐫末一卷則許謙次諸人所刻蓋此本合前後諸刻彙輯

成編也

荆樹居文略十卷

湖北巡撫採進本

清李懋緒撰懋緒字汝時號正所江陵人是編乃其門人楊士瓊所編凡語錄五卷詩文五卷懋緒與趙御眾漆士昌爲友御眾孫奇逢弟子也故耳目濡染其語錄亦宗姚江之學然不爲明季門戶之見以奇逢亦不立門戶故也至於文格樸拙詩多說理之作則講學家之舊派不自懋緒始矣

居業齋文集二十卷別集十卷

湖南巡撫採進本

清金德嘉撰德嘉字會公廣濟人康熙壬戌進士官翰林院檢討德嘉晚年鍵戶著書時同郡顧景星張仁熙劉醇驥往往追摹秦漢宗尙王李訾歸有光爲秀善婉媚德嘉獨不爲高論力摹韓歐雖其閎肆博瞻遜於國初前輩而先民矩矱彷彿猶存惟復胡石莊書謂史館方開吾楚先輩故事尙待折衷江陵當國綜覈名實富國強兵數十年而論者以專病之熊楊慷慨任事而能以過剛見嫉於當世楊專閫仗鉞憂憤以死或曰自縊當時失機逸賊別有主名武陵

豈自經溝瀆者耶云云爲狃於鄉曲之私未可爲萬世之公論也

寶宸堂集四卷

湖北巡撫
採進本

清張希良撰希良有春秋大義已著錄是集凡文二卷詩二卷希良久困名場早年著述頗多亢厲之音自選入詞館後其體格乃一變焉

瓠尊山人詩集十七卷

檢討蕭之家藏本

清夏熙臣撰熙臣字無易孝感人七歲補諸生以歲貢官安陸府教授初著有巢雲閣詩十五卷後增以

新作重編爲此集其詩才情富贍故往往疊韻至五六又和阮籍詠懷擬李東陽樂府殆徧然連篇累幅瑕瑜不免互見亦所謂武庫之兵利鈍互陳者矣

梯青集無卷數

檢討蕭芝家藏本

清項大德撰大德字立上漢陽人刲股療母不愈以哀毀卒是集凡賦二十七首詞四十一首吐屬頗韶秀而得年僅二十有六功候未深故骨格未能成就焉

偶存草堂集六卷

山東巡撫採進本

清林之舊撰之舊字素園楊夢琰序稱其產於魯客
於楚其自署曰孝感蓋寓籍也其取法在中唐南宋
之閒而學力則未逮焉

韓文杜律二卷

內府藏本

明郭正域編正域有批點考工記已著錄是編選錄
韓愈文一卷杜甫七言律詩一卷各爲之評點大抵
明末猖狂之論如謂佛骨表不知佛理之類多不足
與辨所評杜詩欲矯七子摹擬之弊遂動以肥濁爲
詬病是公安之驟乘而竟陵之先鞭也

明文雋八卷

江蘇巡撫採進本

舊本題曰袁宏道精選邱兆麟參補陳繼儒標旨張
臬校閱吳從光解釋陳萬言彙評蓋坊間刻本託宏
道等以行前有周宗建序謂有志公車業者其沈酣
之無後亦必非宗建語也

嶺南文獻三十二卷

江蘇周厚堦家藏本

明張邦翼編邦翼蘄州人萬歷戊戌進士官至廣東
提學副使是集採粵中前哲之文分類編次先文後
詩起唐張九齡迄於明之萬歷凡二百六十餘人於

文帝短歌行長吟永歎思我聖考聖考謂其父武帝也改爲聖老評之曰聖老字奇舊唐書載李泌對肅宗言天后有四子長曰太子宏天后方圖稱制乃鳩殺之以雍王賢爲太子賢自知不免與二弟日侍父母之側不敢明言乃作黃臺瓜詞使樂工歌之其詞曰種瓜黃臺下瓜熟子離離一摘使瓜好再摘使瓜稀三摘猶尙可四摘抱蔓歸其言四摘者以況四子也以爲非四所能盡改爲摘絕

案高棟唐詩品彙載此詩已作摘絕則非

惺之所改然惺因仍誤本是亦其失故仍存炎武之說

此皆不考古而肆臆之

說豈非小人而無忌憚者哉朱彝尊詩話謂是書乃其鄉人託名今觀二人所作其門徑不過如是殆彝尊曲爲之詞也

明詩歸十卷補遺一卷

內府藏本

舊本題明鍾惺譚元春編其邑人王汝南校刊汝南又爲之補綴凡評語稱鍾曰譚曰者其原本稱補曰者汝南所加也然所錄如錢秉鐙南從紀事詩首稱皇帝十四載仲冬月上弦是崇禎辛巳歲也考鍾惺沒於天啟乙丑元春亦以崇禎辛未旅卒何從得秉

鑑辛巳之詩而評之王士禎池北偶談稱坊間有明詩歸鄙俚可笑託名竟陵蓋前人已知其僞矣

名媛詩歸三十六卷

內府藏本

舊本題明鍾惺編取古今宮閨篇什裒輯成書與所撰古唐詩歸並行其間真僞雜出尤足炫惑後學王士禎居易錄亦以爲坊賈所託名今觀書首有書坊識語稱名媛詩未經刊行特覓祕本精刻詳訂云云核其所言其不出惺手明甚然亦足見竟陵流弊如報讐之變爲行劫也

周文歸二十卷

內府藏本

明鍾惺編其書刪節三禮爾雅家語三傳國語楚詞
逸周書共爲一編以時文之法評點之明末士習輕
佻放誕至敢於刊削聖經亦可謂悍然不顧矣

宋文歸二十卷

兩江總督採進本

明鍾惺編宋文多樸實而惺以纖巧之法選之以佻
薄之語評之是爲南轅而北轍其去取之得失可以
不必問矣

國璋集六十一卷

通行本

明方岳貢編岳貢字禹修穀城人天啟壬戌進士官
至東閣大學士事蹟具明史本傳是編乃其官松江
府知府時所刻故徐孚遠李雯陳子龍宋徵璧共爲
校讐而張采爲之序皆松江人也據其凡例蓋所錄
自秦漢以迄南宋卽公羊穀梁二傳及陸賈新語賈
誼新書桓寬鹽鐵論諸子書班范以下諸史贊亦皆
摘鈔而此本僅有唐文二十八卷宋文三十三卷殆
刊刻未全之本或有所散佚歟

古文輯略無卷數

湖北巡撫
採進本

清曹本榮編本榮有奏議稽詢已著錄是書文以體
分各體前俱引文體明辨一條大概因是書而廣之
然所分子目冗瑣特甚舛誤尤多漢文帝賢良文學
策問武帝賢良策問之類亦往往一文而兩載皆失
詳檢鐵券文類止載唐德宗賜王武俊一篇諭祭文
類止載隋文帝祭薛濬一篇之類亦殊挂漏至所載
之文每篇刪削尤不免失其本末

文通三十一卷

兩江總督
採進本

明朱荃宰撰荃宰字咸一黃岡人所著有文詩樂詞

曲五編並以通名見於自序而文通獨先刻成其書
取古今文章流別及詩文格律一一爲之條析蓋欲
仿劉勰雕龍而作其末詮夢一篇酷摹勰之自序然
大抵摭拾百家矜示奧博未能一一融貫也

四庫湖北先正遺書存目卷四

沔陽盧弼輯校

四庫湖北先正遺書札記

四庫湖北
先正遺書
札記一卷

師陽惠可
卷之四
琴平部門

四庫湖北先正遺書札記

沔陽盧弼纂

周易玩詞十六卷 宋項安世撰按宋史本傳項安世字平父其先括蒼人後家江陵所著易玩辭他書多行於世

易經通注九卷 清傅以漸曹本榮撰按皇朝通考御定易經通注四卷湖北叢書本亦作四卷又按湖北通志本榮於順治十二三年均充日講官書卽修於此時雖冠以大學士傅以漸之名乃大官領局之通

例書實成於本榮一人之手蓋當時卽以供日講者
故原稿獨藏其家

北戶錄三卷 唐段公路撰按提要引新唐書藝文志
稱爲宰相文昌之孫當爲臨淄人按唐書段志玄傳
三世孫文昌字墨卿世客荊州太和四年自淮南徙
帥荊南文昌先墓在荊州歲時享祠必薦以音樂歌
舞又按錄異記段文昌負才傲俗落拓荆楚間江陵
有大宅門枕流渠文昌醉於渠上脫履濯足自言我
作江陵節度必買此宅聞者皆笑後果鎮荆南遂買

此宅云云文昌子成式字柯古嘗客居襄陽著酉陽書數十篇成式子安節善音律著樂府新錄據此以觀段氏世居江陵廬墓俱在荊州自與流寓有別

益部方物略記一卷 宋宋祁撰按湖北通志作益部

方物略記圖贊二卷是書舊上下二卷有圖今一卷亡其圖舊爲品七十有六今存六十有五則又佚十
一品矣又按提要作雍邱人考宋史宋庠傳庠字公序安州安陸人後徙開封之雍邱祁爲庠弟當爲安

陸人

益部談資三卷 明何字度撰提要云字度里貫未詳

按明史湛若水傳湛氏門人最著者德安何遷湖北
通志字度字仁仲安陸人侍郎遷仲子官詹事主簿
出爲夔州通判

嵩陽石刻集記二卷 清葉封撰按提要爲黃州人湖
北通志葉封爲黃陂人考黃陂縣明屬黃州府清雍
正七年改屬漢陽府見大清一統志

項氏家說十卷附錄二卷 宋項安世撰按湖北通志
作附錄四卷又引讀書附志云項安世平父之說說

經史文學爲甚詳平父江陵人自號平菴辛克承刻於江陵郡齋而爲之識

星學大成十卷三命通會十二卷 明萬民英撰提要

作大甯都司人湖北通志民英字育吾江夏人案題名碑錄萬民英大甯都司茂山衛右所軍籍湖廣江夏縣人嘉靖二十九年進士歷官河道監察御史福建布政司右參議

鬻子一卷 漢書藝文志鬻子二十二篇 名熊爲周師自文王以下

問焉周封 王先謙漢書補注沈欽韓曰隋志鬻子一爲楚祖

卷唐宋著錄皆以冠道家葉夢得云今一卷止十四

篇本唐永徽中逢行珪所獻庾仲容子鈔

當作煥隋志梁黟令

庾仲容子鈔三十卷

馬總意林並云六篇其所載與行珪先後

不倫恐行珪或有附益案今亦十四篇標題甲乙數

目雜亂不可曉又短僂不成章而列子天瑞黃帝立

命三篇引鬻子賈誼修政下篇周文王武王成王問

於鬻子有七章皆本書所無今本其糟粕耳小說亦

有鬻子十九篇

鶡冠子三卷

漢書藝文志鶡冠子一篇

楚人居深山以鶡為冠

王先謙補注沈欽韓曰隋唐志三卷韓子讀鶡冠子
云十六篇讀書志云十五篇通考晁氏云案四庫書
目十六篇與愈合已非漢志之舊今書乃八卷前三
卷十三篇與今所傳墨子同中三卷十九篇愈所稱
兩篇皆在後兩卷有十九篇多稱引漢以後書皆後
人雜亂附益之今削去前後五卷止存十九篇庶得
其眞案宋陸佃所注自博選至武靈王十九篇然其
中龐煖論兵法漢志本在兵家爲後人傅合耳其語
多有可采柳宗元謂惟賈生鵬賦所引用者爲美餘

無可者彼信遍觀之而定論耶何其牘疏也韓子之言當矣

東軒筆錄十五卷 宋魏泰撰案宋史藝文志有續雜錄一卷讀書志通考並有續錄一卷

筆記三卷 宋宋祁撰按湖北通志宋志雜家宋祁筆錄一卷蓋以帙爲卷不以上中下爲卷

張氏可書一卷 宋張知甫撰按湖北通志云書中自言大父諱問字昌言初與种世衡有舊及憂居世衡遺以汝州田十頃辭不受考張問襄陽人宋史本傳

及康熙志並載其辭田不受事歸安陸心源爾宋樓
藏書志亦云張知甫襄陽人見韋居安梅磻詩話是
書原本心源從穴硯齋舊鈔傳錄刊入叢書首闕一
葉所存凡一百一十二條視今館閣輯本多六十二
條其云大父諱問一條亦輯本所無也

先進遺風二卷 明耿定向撰按明史藝文志湖北通
志俱編入史部傳記類

李北海集六卷附錄一卷 唐李邕撰按大清一統志
唐李邕江都人嘗遷居江夏杜甫詩稱爲江夏李邕

今縣有李邕宅

雪樓集三十卷 元程鉅夫撰提要作建昌人按元史

本傳程鉅夫名文海以字行其先自徽州徙京山

丁鶴年集一卷 元丁鶴年撰提要作色目人按大清

一統志丁鶴年其先西域人父知默特羅丹爲武昌

縣達嚕噶齊遂爲武昌人淮兵襲武昌奉嫡母走鎮

江母歿鹽酪不入口者五年復避地四明後還武昌

生母馮已前死不知殯處痛哭行求母告以夢乃齧

血沁骨斂而葬焉烏斯道爲作丁孝子傳鶴年好學

洽聞精詩律晚學浮屠結廬居父墓卒

一山文集九卷 元李繼本撰提要作東安人按湖北通志云按錢氏補元史藝文志李繼本一名守成士瞻子蓋亦荆門人也元詩選李士瞻小傳云子守成後名延興明洪武間嘗典邑校又曰經濟集一山集皆曾孫伸所編次吉安知府張廷璽又嘗合彥聞父子詩文爲濟美集明詩綜十四卷中實有李延興詩提要蓋偶未詳考云

詩牖十五卷 明錢天錫撰提要作竟陵人按湖北通

志云存目以天錫爲竟陵人蓋誤今據沔陽州志改
太學題名碑錄正作沔陽人

春秋左傳類解二十卷 明劉績撰按嘉慶湖北通志
引四庫存目今通行本四庫書目無之

大學管窺一卷中庸管窺一卷 明廖紀撰提要作東

光人按湖北通志引黃梅志紀黃梅人弘治十八年

進士官至廣西按察司副使四庫存目云紀東光人

今考太學題名碑錄東光廖紀乃弘治三年庚戌進

士此廖紀弘治十八年乙丑進士直隸九江衛官籍

湖廣黃梅縣人存目混爲一人蓋偶誤也

黃公說字無卷數 清顧景星撰按湖北通志黃公說字一百卷存目原注湖北巡撫采進本無卷數小學考云四庫全書目一卷誤也喻文鏊湖北先賢學行略稱爲黃公說字記卷凡一百三十亦誤書實一百卷黃公原彙本並自繕正本皆見存武昌柯氏息園其書先列篆文次以今隸而著其義說意在明偏旁點畫嬗變源流以正廖氏正字通之謬誤雖未盡綜覈要爲宏著矣

明詞林人物考十二卷 明王兆榘撰按明史藝文志
作十六卷榘作雲又明志地理類王兆雲烏衣佳話
八卷小說家類王兆雲驚座新書八卷俱作兆雲

日涉編十二卷 明陳堦撰按湖北通志堦字升也應
城人士元子歲貢生是書一名編日新書提學周師
且爲梓於南畿賀逢聖序之康熙間漢川歐陽景台
得其手錄本重加編次序而刻之名其書曰事類新
編見漢川志

讀書考定三十卷 明程良孺撰提要但云湖北人按

湖北通志引孝感志良孺字穉修孝感人由選貢任
行唐知縣歷戶部員外郎權許墅關卒於任存目誤
以程爲陳以孺爲儒又云崇禎中由蔭生官光祿寺
典籍亦異又按明史藝文志類書類程良孺茹古略
八十卷與存目卷數不同

存目云
三十卷

智品十三卷 明樊玉衝撰按湖北通志云樊玉衝撰
存目作玉衡蓋刊誤千頃堂書目作樊衡玄智品十
三卷亦誤按玉衝字玄之千頃堂書目或因此訛寫
強識略四十卷 明吳夢材撰按明史藝文志作吳楚

材強識略二十四卷與提要不同

春秋內外傳類選八卷 明樊王家撰按湖北通志云

王家江陵人萬曆三十二年進士官至參政存目謂

爲潛江人蓋誤

西巡類稿八卷 明吳廷舉撰提要作梧州人按明史

本傳字獻臣其先嘉魚人祖戍梧州因家焉

龍洲集十四卷附錄二卷龍洲詞一卷 宋劉過撰提

要作廬陵人直齋書錄解題劉改之詞一卷襄陽劉

過改之撰按岳珂程史卷二劉改之詩詞一則廬陵

劉改之過以詩鳴江西厄於韋布放浪荆楚客食諸
侯間開禧乙丑過京口余爲鑲幕庾吏因識焉云云
按岳珂與過交游自能悉其里貫其爲廬陵人無疑
又按過和劉叔擬詩草露青原淚煙波白鷺心班超
歸未得想見舊家林小註廬陵有青原山白鷺洲云
云此亦爲廬陵人之一證見羣賢小集中之龍洲道人詩集是集亦題廬陵劉
過改其襄陽歌十年著腳走四方胡不歸來兮襄陽
當爲流寓至此與岳珂放浪荆楚之語相合故未收
入湖北先正遺書中

揮塵前錄四卷後錄十一卷第三錄三卷餘話二卷玉
照新志六卷投轄錄一卷 宋王明清撰按提要云
明清字仲言汝陰人慶元中寓居嘉興書錄解題稱
其官曰朝請大夫宋詩紀事則曰泰州倅未詳孰是
又按揮塵前錄末附乾道己丑沙隨程迴跋云揮塵
錄一編汝陰王仲言所作臨汝郭九憲跋云郡邑相
距餘一舍仲言入郭有時不得朝夕見斯心竟未能
滿明清自跋淳熙乙巳朝請大夫汝陰王明清書又
按趙彥衛雲麓漫鈔云汝陰王明清字仲言有揮塵

錄云塵史亦其從祖王彥輔所撰是當時題跋記載
與明清自署俱曰汝陰無俟深辯世人所以致疑者
則以直齋書錄解題云塵史三卷司農少卿安陸王
得臣彥輔撰嘉祐四年進士其序稱政和乙未行年
八十自號鳳臺子蓋王昭素之後王銍性之之伯父
揮塵錄詳載又云雪谿集略八卷汝陰王銍性之撰
國初周易博士昭素之後其父萃樂道嘗從歐公學
銍爲會紆壻嘗撰七朝國史其子明清著揮塵錄又
云揮塵錄三卷後錄十一卷第三錄三卷餘話一卷

朝請大夫汝陰王明清仲言撰明清銓之子曾紆公
袞之外孫據以上所記錄銓爲得臣之姪明清爲得
臣之姪孫然一則籍隸安陸一則籍隸汝陰里貫各
異似非同族故提要塵史三卷條下按語云書中神
受門第七條稱王樂道幼子銓少而博學善持論又
詩話門第十九條稱王銓性之嘗爲子言讒謗門第
三條稱王萃樂道奉議穎人也則與銓父子非一族
陳氏誤也據書錄解題所書籍貫互有參差據提要
所引則彥輔自述語氣顯非同族然則究以何者爲

是若謂陳氏果誤則揮塵後錄卷八第二條云伯祖
彥輔以文學政事揚歷中外甚久伯祖名得臣自號
鳳臺子有注和杜少陵詩塵史行於世又卷七第二
十六條云先祖早歲登科留心典籍所藏書迨數萬
卷貯之鄉里汝陰士大夫多從而借傳元符末坐黨
籍謫官湖外乃於安陸卜築爲久居計輦置其半於
新居建炎初寇盜蜂起惟德安以邑令陳規元則帥
眾堅守先祖遺書悉爲元則載去後十年元則守順
昌先祖汝陰舊藏書又爲元則所掩有云云觀明清

自記稱得臣爲伯祖又云由汝陰徙安陸則是與得
臣爲一族特著籍不同耳然以予考之當以得臣所
自記爲據提要所引塵史各條以摘陳氏者爲非何
以言之按書錄解題言王得臣爲王昭素之後又云
王銍國初周易博士昭素之後宋史儒林傳王昭素
開封酸棗人少篤學不仕博通九經尤精詩易著易
論二十三篇開寶中李穆薦之朝詔召赴闕見之便
殿賜坐講易拜國子博士東都事略揮塵前錄卷一
所載相同第十四條云明清五世祖拾遺開寶八年以近臣薦

自布衣召對講易於崇政殿與宋史儒林傳所載一
一相合據此以論得臣與銓父子同爲王昭素之後
嗣確然無疑子孫蕃衍遞傳數世宗族疏遠輾轉遷
徙散居楚豫之間謂里貫不同則可謂非一族則不
可謂同出一族則可謂同族而必同里貫則不可故
得臣爲安陸人明清爲汝陰人兩不相妨不必強合
致多穿鑿也

四庫總目提要有聚珍本揚州本廣州本世稱揚州本
勝於廣州本余取揚州本與廣州本對勘揚州本如

春秋類存目二春秋義解條其他大夫奔殿廣州本
作殺

五經總義類存目五經異文條真之作貞廣州本
作貞四

書類二論語類考條皆以元案列之廣州本
作別之正史類

存目史記瑣瑣條亦未見全本廣州本
亦未見全本別史類

東觀漢記條作列傳載記廣州本
作載記又所作靈紀及十

意廣州本作千志掃葉本作十意醫家類二奇脈八經考條故特評

其病源治法廣州本作詳其藝術類益州名畫錄條李方叔

載德隅齋畫品蜀筆居半廣州本德隅齋畫
品載蜀筆居半別集類

十一漢濱集條至其論和議之策廣州本
作和戰別集類存

目四李氏山房詩選條評語下有蓋非其全集也六

字

廣州本無之

別集類存目五二西園詩集條黃貫曾廣

州本改作黃省曾別集類存目六小山草條山草堂

廣州本作小山草堂

別集類存目八闡修齋稿條激而生變誤

作生端

廣州本不誤

可以判兩本校勘之精否矣

沔陽盧氏慎始基齋刊印各種 均照定價捌折

湖北先正遺書

壹百捌拾本

定價

連史玖毛邊柒

拾圓

慎始基齋叢書

捌本

定價粉連五圓

湖北先正遺書書目

四本

定價

粉連貳圓毛泰壹

圓

童內方先生集

四本

定價粉連叁圓

市隱園集

拾本

定價粉連柒圓

李子銘先生集

一本

定價粉連五角

萬里游草殘稿

一本

定價粉連五角

割圍術輯要

一本

定價光紙四角

萬象一原演式

一本

定價光紙四角

節庵先生遺詩

二本

實價夾棉連四五圓

寄售處

琉璃廠直隸書局

隆福寺文奎堂

青雲閣富晉書社

琉璃廠各大書坊

北京文楷齋承印

